



novel 
comel

Cinderella di Aildilfitri

Ain Maisarah



Fasha merenung lama ke arah mop yang diserahkan kepadanya.

‘Urgh!’ Dalam hatinya merontaronta melawan rasa jijik yang menguasai. Wajahnya berkerut seribu. Terasa meremang bulu roma menahan tekak yang kembang mahu termuntah!

“Tunggu apa lagi?”

Fasha masih terkebil-kebil memandang mop itu. Dia sempat mengerling ke arah Shasha di sebelah. Shasha lebih kronik. Diberikan penyental tandas. Kelihatan

Cinderella di Aidilfitri

Shasha juga sudah menjimbit geli peralatan itu. Riak wajah Shasha sudah pucat lesi.

“Tunggu apa lagi? Bersihkan tandas itu sekarang.” Suara Puan Hajah Zaiton kedengaran tegas tetapi intonasinya kekal tenang.

Fasha mengerling memandang enam rakannya yang lain. Tiada siapa memulakan sebarang pergerakan. Tiada siapa menampakkan tanda-tanda mahu menjadi sukarela yang merasmikan segalanya.

“Saya kira sampai tiga. Jika tiada siapa mula membersihkan tandas, saya akan telefon Toh Puan Sri Zazarina dan Datin Rina Kirana. Saya juga akan panggil semua ibubapa kamu datang ke sekolah. Hari ini juga!”

Ugutan Puan Hajah Zaiton kedengaran menakutkan. Tambah lagi tangannya sudah menyeluk beg tangan yang dibawa. Tentu sekali mahu mencari telefon bimbit dan mula

mendail nama-nama bahaya yang disebut tadi.

Fasha cepat-cepat menggamit Sazzy yang memegang baldi supaya mendekati. “Saz... isi air sampai penuh.”

Sazzy patuh dengan perintah ketuanya. Fasha memandang Nana pula.

“Nana... awak berus sampai kilat semua sinki.” Jari telunjuk Fasha yang runcing itu sudah menunjuk-nunjuk ke arah empat sinki yang ada. Nana menerima arahan itu dengan anggukan kepala. Baru sahaja dia mahu mendekati sinki itu dan mula memberus, tiba-tiba Fasha menjerit dengan nada nyaring.

“Tunggu dulu!”

Nana terpinga-pinga jadinya. Tadi Fasha juga yang beriya-ya mengeluarkan arahan suruh mula memberus sinki. Kini secara brek kecemasan, dia menghalang pula.

Cinderella di Aidilfitri

Pelik! Semua mata memandang ke arah Fasha. Puan Hajah Zaiton sendiri berkerut dahi dengan kelakuan Fasha. Fasha cepat-cepat menyeluk koceknya. Dikeluarkan sesuatu yang kelihatan menyerupai plastik. Dia dilihat menceraai-ceraikan plastik itu. Diserahkan plastik itu kepada Nana, Fazura, Linda, Diana, Sazzy, Shasha dan tidak ketinggalan Ritah bt Ridaini juga.

“Pakai sarung tangan. Jangan sampai kuman dalam tandas ni melekat pada tangan kita.” Fasha sendiri sudah menyarung tangannya dengan pelapik plastik itu. Semua ahli *The Wannababes* mematuhi dan mengikut jejak ketua mereka.

Puan Hajah Zaiton kekal jadi pemerhati. Hatinya digeletik rasa mahu ketawa melihat gelagat anak-anak orang kaya itu. Tentu tidak pernah seumur hidup dan sepanjang hayat mereka dikerah membasuh tandas. Apabila sahaja melihat semua pelajar yang didenda itu sudah siap sedia bersarung tangan, dia

kembali bersuara. “Saya akan datang semula memeriksa keadaan tandas ini dalam masa satu jam.”

Dengan kata-kata itu, Pengetua Sri Bangsar meninggalkan tandas. Hilang sahaja kelibat guru berusia separuh abad itu, mulut semua *The Wannababes* sibuk membebel serentak.

“Isk! Gelinya! Busuknya! Berlumutnya!”

Seribu satu keluhan menjadi zikir basahan bibir lapan gadis itu. Sesungguhnya inilah pertama kali dalam sejarah, *The Wannababes* mencemar jari-jemari mereka dengan memberus dan menyental kotoran degil di tandas sekolah Sri Bangsar.

Penyesalan tiada berguna lagi,

Masa tidak boleh diundur kembali,

Hukuman dijatuhkan tanpa kompromi,

The Wannababes menanggung deritanya kini,

Cinderella di Aidilfitri

Akibat membuli Mimi Monira sesuka hati,
Tiga bulan tandas mesti dicuci,
Baru padan dengan muka sendiri!



Perjumpaan tergepar itu diadakan di rumah Fasha. Wajah tujuh sekawan itu monyok macam cencorot. Tiada siapa pun yang bercakap walau sepatah. Masing-masing sibuk menyonyoh jari dengan pelbagai jenis krim dan losyen yang dikumpulkan di bahagian tengah katil. Fasha sendiri laju sahaja tangannya menarik tisu lembap jenama Johnson Baby. Dipastikan celah-celah kuku dibersihkan sebaik mungkin. Shasha memilih merendam tangannya dengan air suam yang sudah dititikkan dengan cecair Dettol. Biar semua kuman yang berani-berani hinggap itu mati lemas semuanya!

Masing-masing kelihatan cemas. Pengalaman ngeri mencuci tandas itu masih lagi segar dalam ingatan. Tidak sanggup rasanya mahu mengingat kembali bau aromaterapi tandas Sri Bangsar yang menyeksa jiwa dan mendera minda itu.

Fasha orang pertama memecah sunyi. Dia mengeluh panjang. Tidak terfikir langsung, dia bakal berhadapan dengan denda yang sangat memalukan. Bukan dia tidak tahu, satu sekolah sedang heboh bergosip tentang *The Wannababes*. Malah dia sudah terdengar bunyi desir khabar angin yang kuat bertiup masa kini. Sudah ada yang berani menggelar *The Wannababes* dengan gelaran baru. Gelaran yang boleh sakit jiwa apabila mendengarnya. *The Wannababes* kini digelar *The ToiletBabes*!

“*Girls*, macam mana kita nak bertahan cuci tandas selama tiga bulan? Sehari pun rasa boleh mati!” Fasha memandang kosong ke arah enam ahli lain. Dia tidak tahu

Cinderella di Aidilfitri

jalan terbaik mahu melepaskan diri dari cengkaman denda yang sungguh-sungguh mendera ini.

Fazura menganggu. Dia memegang ke arah rambutnya yang panjang bersinar. “Saya rasa satu badan dah melekat kuman tandas. Mandi dua jam pun belum tentu dapat hilangkannya. Rambut saya dah mula rasa gatal-gatal.”

Sazzy turut menunjukkan kepada semua kukunya yang sudah kusam tidak bersinar. “Faz.... rambut awak rasa gatal. Kuku saya pula dah tak bersinar macam selalu. Ini semua gara-gara terkena sabun mencuci sinki.”

Semua ahli menunjukkan simpati kepada penderitaan teman-teman lain. Namun apakah daya, ini denda yang sudah tersurat hitam putihnya. Ini adalah nasib mereka selama tiga bulan akan datang!

“Tiga bulan kita jadi hamba cuci tandas! *How awful is that?*” Diana sudah memicit-micit kepala sendiri gaya dramatik. Sesungguhnya kepala sudah rasa terbeban dengan situasi yang dialami itu.

Shasha sendiri diam sahaja. Dia sudah selesai merendam jari-jemarnya. Sedikit kecut apabila direndam terlebih masa. Kemudian dia mencapai tuala putih milik Fasha lalu mengeringkan dua tangannya. “Fasha, *I think we need to think of a way to escape from all this.*”

Fasha memandang Shasha. Penolongnya yang boleh diharap. Penolongnya yang banyak memberi buah fikiran yang bernas berbanding ahli lain. “Awak ada cadangan?”

Shasha menggaru-garu dagu sendiri. Kepalanya ligat mencari jalan keluar dari permasalahan ini. Lima saat berdiam, satu senyuman paling lebar mula menghiasi wajah Shasha.

Cinderella di Aidilfitri

“Saya ada idea.” Shasha membuat pengumuman.

Kelihatan semua enam ahli *The Wannababes* yang lain sudah memasang telinga. Perhatian dan tumpuan hanya kepada Shasha seorang.

“Semua sedia maklum, Pengetua akan memeriksa kerja-kerja kita di tandas. Tapi dia hanya akan memeriksa waktu awal dan akhir. Kita mula bersihkan tandas pukul 1.30 tengahari. Pengetua akan memeriksa hasil akhirnya pukul 2.30 petang. Sebenarnya kita ada waktu satu jam tanpa sebarang kawalan.”

Shasha mula mendedahkan keputusan pemerhatiannya. Kelihatan Fasha sendiri mengangguk tanda bersetuju dengan fakta informasi yang dilaporkan oleh Shasha itu. “*So? What can we do in those free one hour time?*”

Shasha tersengih. Dia sudah mula merencana strategi mencuri tulang yang efektif sekali. “Dalam masa satu jam tanpa pengawasan itu, kita boleh dapatkan bantuan orang lain mencuci tandas.”

Sazzy mengangkat kening. Sedikit keliru dengan kata-kata Shasha. “Takkan kita nak membuli pelajar lain pula? Kita ugut suruh mereka cuci tandas untuk kita? Itu rancangan awak?”

Shasha menggeleng. “Isk! Nak cari nahas? Kita didenda cuci tandas kerana membuli Mimi Monira. Saya bukan bodoh sangat nak tambah masalah kita dengan membuli pelajar lain pula!” Shasha mengerling tajam ke arah Sazzy.

Sazzy tunduk. Tekaannya tersasar. “*Then? What’s your plan?* Siapa nak gantikan kita mencuci tandas?”

Persoalan itu bermain di benak fikiran semua. Hanya Shasha yang tersenyum

Cinderella di Aidilfitri

menang kerana dia sahaja yang punya jalan keluar dari masalah ini. “Kita akan suruh orang gaji kita bersihkan tandas!”

Mata Shasha bersinar dengan cahaya. Mendengar sahaja rancangan Shasha itu, Fasha sendiri perlahan-lahan mengukir senyuman. “Bagus Shasha! Bijak! Bijak! Cadangan awak memang *class*!”



Petang itu selesai sahaja waktu persekolahan, semua ahli *The Wannababes* sudah beratur panjang di hadapan tandas. Mereka menanti ketibaan Puan Hajah Zaiton yang akan menyelia program hukuman.

Fasha mencuit Shasha, “Macam mana?”

Shasha mengangguk sambil mengenyit mata, “Beres!”

Mendengar kata-kata jaminan Shasha, Fasha sudah tersenyum lebar. “*Good job, dear!*”

Ahli-ahli lain juga sudah melepaskan nafas penuh kelegaan. Hari ini nasib mereka bakal berubah. Tidak seperti semalam yang mencatatkan seribu satu pengalaman busuk, ngeri dan geli. Hari ini mereka akan terlepas dari hukuman denda mencuci tandas! Segalanya berkat kebijaksanaan Shasha!



“Semua dah ada?” Puan Hajah Zaiton berjalan memeriksa barisan lapan pelajar perempuan di hadapannya. Tiada siapa yang menjawab. Hanya mengangguk kepala sebelum mengunci mata memandang lantai.

“Bagus. Ini merupakan hari kedua hukuman mencuci tandas. Semalam saya berpuas hati dengan kerja kamu semua.”

Kata-kata Puan Hajah Zaiton itu berupa pujian gaya sembunyi.

Ketika itu Fasha dan rakan-rakan sudah tersenyum segaris. Bukan mudah Pengetua mahu memuji mereka. Maklum sahaja, semua ahli *The Wannababes* tidak tergolong dalam kumpulan bijak pandai akademik. Nama mereka tersohor kerana glamor, popular dan gedik yang terlebih dos. Jadi apabila Pengetua memuji buat pertama kali dalam sejarah, terasa berbunga juga hati.

“Hari ini saya berikan masa satu jam. Kamu bertujuh akan mula membersihkan tandas pukul 1.30 tengahari. Tepat pukul 2.30 petang saya akan datang semula dan memeriksa hasil kerja kamu.” Itu kata-kata terakhir Puan Hajah Zaiton sebelum melangkah pergi. Apabila melihat sahaja kelibat guru itu menjauh dan akhirnya hilang dari pandangan, Shasha sudah mengenyit mata.

“Ready everyone?” Dia memandang dengan pandangan rahsia.

“YES!” Mata enam ahli *The Wannababes* lain bersinar macam kucing!



“Ritah, awak bertugas mengawal keadaan di luar. Ambil span dan baldi ini. Pura-pura basuh pintu masuk tandas.” Shasha sudah menyerahkan peralatan itu kepada Ritah. Muka Ritah masam mencuka. Namun dia tidak berani melawan apatah lagi membantah. Diturut sahaja arahan Shasha.

Mengambil span dan baldi yang dihulur, Ritah mula melangkah keluar dari tandas. Tetapi langkahnya terhenti apabila Fasha memanggilnya kembali.

“Ritah. Pastikan awak menjadi pengawal yang efisien. Ada sesiapa sahaja yang nak masuk tandas, cepat beritahu kami.”

Cinderella di Aidilfitri

Sekali lagi Ritah mengangguk kepala, penuh tidak rela.

Apabila sahaja Ritah sudah berkawal di luar, Fasha menggamit Shasha. “*Line clear*. Boleh arahkan pekerja kita membasuh tandas sekarang.”

Shasha tidak menjawab sebaliknya tangkas mendekati kubikel-kubikel tandas. Diketuknya pintu tandas pertama. “Tok. Tok. Tok.” Tiga kali sahaja. Lalu dengan perlahan Shasha berbisik, “Kamu boleh keluar sekarang!”

Pintu mula terkuak. Seorang pekerja Indonesia yang berpakaian T-shirt dan seluar sukan memunculkan diri. Dia memandang Shasha dan tunduk penuh hormat. “Cik Shasha, mahu dicuci tandasnya sekarang?” Dengan loghat bahasa Indonesia yang pekat, pekerjaanya itu mahu meminta kepastian.

Shasha mengangkat tangan, tanda suruh menunggu. Shasha kemudian ke pintu

kubikel tandas yang kedua. Dia mengetuk pintu itu pula. Sama sahaja gayanya. Tiga kali ketuk dan berbisik mengarahkan pembantu rumahnya keluar dari tempat persembunyian.

Shasha kemudian mengetuk pula pintu ketiga. Nampaknya dia sudah menyeludup masuk secara haram tiga orang pembantu rumahnya ke situ. Ketiganya juga awal-awal lagi sudah disuruh bersembunyi di dalam tandas sebaik sahaja jam menunjukkan angka 1.00 tengah hari.

“Baiklah Sima, Simi dan Simu. Sekarang saya mahu kamu bertiga cuci tandas ini. Dalam masa satu jam semuanya mesti bersih.” Shasha sudah memberikan arahan kepada tiga orang pembantu rumah Indonesia yang wajahnya seiras kerana mereka kembar seiras tiga beradik.

Terangguk-angguk sahaja ketiga-tiganya kerana mereka jelas kelihatan menghormati Shasha. Enam ahli *The Wannababes* yang

Cinderella di Aidilfitri

lain memandang Shasha dengan penuh kagum. Memang sukar mencari pembantu rumah yang mendengar kata. Lebih-lebih lagi mengikut arahan anak majikan. Sazzy dan Fazura sendiri mempunyai pembantu rumah yang tidak berdedikasi. Melihat Shasha dapat mengawal pembantu rumahnya dengan baik sekali, mereka jadi tabik spring!

Sima sudah mencapai mop. Simi mula menggosok sinki. Simu pula sudah menyinsing lengan mahu menyental mangkuk tandas. Ketiga-tiganya mula berkerja serentak dengan efisien sekali.

Apabila ketiga-tiga pembantu rumah itu sudah menjalankan aktiviti membersihkan tandas, Fasha pula mengeluarkan arahan seterusnya. “Keluarkan semua alat menghilangkan kebosanan kita.”

Nana dan Diana segera menuju ke arah pam tandas di kubikel nombor satu. Mereka bertugas meletakkan segalanya

di situ bagi mengelak Puan Hajah Zaiton dapat mengesannya. Operasi dijalankan secara rahsia ketika waktu rehat. Nana dan Diana kembali membawa bersama pemain MP3 jenama Ipod Nano kepada semua ahli *The Wannababes*. Setiap ahli juga diserahkan senaskah majalah CLEO yang menjadi majalah rasmi kumpulan mereka. Ia berfungsi membantu semua ahli kekal mengikut fesyen terkini. Memang begitulah perangai *The Wannababes*. Mereka lebih rela mengulangkaji majalah dan bukannya buku Sejarah!

“*Girls!* Mari kita mulakan sesi karaoke kita!” Pengumuman Fasha itu menerima tepukan gemuruh semua ahli lain!



Seminggu segalanya berjalan lancar. Mereka berjaya menyeludup masuk pembantu rumah ke dalam sekolah melalui jalan masuk pintu pagar berdekatan kantin. Tiada siapa

Cinderella di Aidilfitri

yang menyedari. Ini kerana pembantu rumah yang diseludup itu disangka pekerja kantin Sekolah Menengah Sri Bangsar. *The Wannababes* juga licik menutup jejak. Dipastikan pembantu rumah itu bersembunyi dalam kubikel tandas sekurang-kurangnya setengah jam sebelum masa hukuman berlangsung. Ini bagi mengelakkan pembantu rumah itu terserempak dengan Puan Hajah Zaiton. Mereka juga yakin Puan Hajah Zaiton tidak akan melakukan sebarang perkara luar kelaziman sepanjang program hukuman.

~ Pukul 1.30 tengah hari berkumpul dan berbaris di hadapan tandas.

~ Satu hingga dua minit masa memberi arahan dan amaran.

~ Tepat pukul 2.30 petang, Pengetua akan datang dan memeriksa hasil akhir cucian.

Itu membuatkan semua *The Wannababes* makin riang ria. Mereka tidak perlu lagi risau dengan kuman merbahaya akibat menyental sinki. Mereka tidak perlu sakit-sakit pinggang mengemop dan membersihkan lantai. Mereka juga tidak perlu menyinsing lengan membersihkan segalanya. Kini sebuah sistem penggiliran telah diwujudkan. Setiap hari pembantu rumah *The Wannababes* akan bergilir-gilir mencuci tandas.

Hari Mencuci	Pembantu rumah bertugas
Isnin	Sima, Simi dan Simu (pembantu rumah Shasha)
Selasa	Rianda dan Warmi (pembantu rumah Fasha)
Rabu	Nirmala (pembantu rumah Fazura)
Khamis	Yayanti (pembantu rumah Sazzy)

Cinderella di Aidilfitri

Jumaat

Susi
(pembantu rumah Nana)



Minggu kedua sistem hukuman berlangsung, Ritah tetap kekal bertugas jadi penunggu. Dia tidak menyukai tugas itu kerana tidak dapat bersuka-ria dengan ahli *The Wannababes* yang berkaraoke di dalam. Namun Ritah tidak sesekali berani membantah keputusan Fasha. Maka jadilah Ritah pengawal keselamatan sepenuh masa yang berkawal di depan pintu tandas.

Hari Isnin itu, tujuh ahli *The Wannababes* beratur seperti biasa menunggu kehadiran Puan Hajah Zaiton. Ritah satu-satunya orang asing yang dihukum bersama *The Wannababes*. Lapan pelajar perempuan itu setia berdiri di hadapan tandas. Pelik. Pengetua masih tidak memunculkan muka walaupun jam sudah menunjukkan waktu pukul 1.40 tengahari.

“Entah-entah hari ini kita dibebaskan dari hukuman denda.” Tiba-tiba Fazura memecah kesunyian.

Masing-masing menjongkit kening. Tanda pelik dengan kenyataan Fazura itu.

“Dibebaskan dari hukuman? Kenapa?” Nana cepat sekali bertanya. Wajahnya terselit sedikit sinar harapan.

“Seminggu kita berjaya membersihkan tandas dengan baik sekali. Mungkin Puan Hajah Zaiton dah lembut hati.” Fazura berkongsi sama telahan masa depan di dalam benaknya.

Sazzy juga mengangguk-angguk, “Betul cakap Faz. Pengetua kita bersifat keibuan. Bukan kejam macam Cikgu Amnah. *Maybe she will let us off soon.*”

Perbualan semua pesalah itu makin rancak. Masing-masing berkongsi pendapat dan jangkaan. Jarum minit makin bergerak.

Cinderella di Aidilfitri

Tiada tanda-tanda Puan Hajah Zaiton bakal memunculkan diri. Masing-masing sudah senyum hingga nampak gusi.

Segala bual bicara itu terhenti dengan brek kecemasan apabila terlihat kelibat seorang guru yang amat dikenali. Wajahnya serius. Langkahnya pantas. Destinasinya makin mendekati. Ketika itu senyuman ahli *The Wannababes* memudar. Jantung berdegup cemas. Suasana riang-ria sekelip mata berubah kepada ketakutan paling maksimum.

Kelibat Cikgu Amnah binti Ahmad, guru disiplin Sekolah Menengah Sri Bangsar kini betul-betul sudah di hadapan mata.



Guru yang diberi gelaran Harimau Hidup dan Jambul Terlebih Kembang itu sudah berada di depan mata. Dia memerhati satu per satu wajah pelajar-pelajar yang

dihukum itu. Matanya mencerun. Keningnya berkerut.

“Puan Hajah Zaiton menghadiri mesyuarat hari ini. Saya ditugaskan menggantikan Pengetua. Saya akan mengawalselia kamu semua.”

Pengumuman Cikgu Amnah itu berjaya memucat-lesikan muka semua orang. Shasha sudah mengerling Fasha. Hati masing-masing jadi berdebar. Jantung terasa berhenti denyutannya!



Rutin pengawalseliaan Cikgu Amnah berbeza dengan Puan Hajah Zaiton. Cikgu Amnah bagaikan terlebih rajin. Dia memberikan nasihat tentang harapannya supaya program hukuman yang dijatuhkan ini akan menimbulkan kesedaran dan kekesalan dalam jiwa pelajar. Hampir lima minit juga

mulut Cikgu Amnah berleter. Lenguh lutut terpaksa ditahan.

Cikgu Amnah akhirnya mengarahkan kesemua lapan pelajar itu masuk ke tandas dan mula membersihkan tandas. Kebimbangan makin memagut hati apabila Cikgu Amnah ikut sama masuk ke tandas. Dia jadi pemerhati setia. Matanya tajam macam CCTV. Mahu tak mahu, semua ahli *The Wannababes* terpaksa berlakon mencuci tandas. Fasha mencemar duli memegang mop. Shasha dengan penuh geli mula memegang span. Semuanya berlakon memainkan peranan masing-masing. Hanya tiga kubikel tandas yang tertutup rapat pintunya yang tidak dibersihkan.

Cikgu Amnah memerhati gaya lapan orang pelajar itu mencuci tandas. Apabila melihat terlalu ramai yang menyental lantai, dia mengeluarkan arahan baru.

“Saya mahu tiga orang bersihkan bilik tandas.” Mata Cikgu Amnah memandang ke arah Sazzy.

Sazzy dalam ketakutan cuba mengelak, “Tapi Cikgu.... pintu tertutup. Ada orang di dalam.”

Cikgu Amnah mengerut dahi kehairanan. Lama benar pelajar-pelajar itu menggunakan tandas. Tiga-tiga pintu tertutup pula. “Cuba kamu ketuk.” Arahan Cikgu Amnah itu menambah bala.

Maka dengan penuh terpaksa, Sazzy melangkah mendekati pintu tandas yang pertama. Diketuknya bertalu-talu. Dia berharap pembantu rumah Shasha yang bersembunyi dalam tandas itu tidak akan keluar.

“Ketuk juga dua lagi pintu tu. Mustahil guna tandas lama sangat.” Arahan Cikgu Amnah makin mengecutkan perut semua. Sazzy melangkah lambat-lambat mengetuk

Cinderella di Aidilfitri

kesemua tiga pintu kubikel yang tertutup rapat itu.

Perlahan-lahan pintu-pintu itu mula dibuka. Sima, Simi dan Simu menjenguk ke luar. Wajah masing-masing penat terperap dalam tandas yang baunya kurang menyenangkan. Melihat sahaja wajah Shasha, Sima terus berkata, “Cik Shasha, lama benar kami tunggu dalam tandas. Tak boleh bernafas dibuatnya.”

Kata-kata Sima si pembantu rumah itu membuatkan Cikgu Amnah mula memerah muka. Rahsia terbongkar. *The Wannababes* bakal menerima lagi padahnya!



Puan Hajah Zaiton merenung satu per satu wajah para pelajar di hadapannya. Keruh dan kesal sekali. Tidak disangka langsung, mereka boleh merancang sesuatu yang selicik ini. Sanggup menyeludup masuk pembantu

rumah ke dalam sekolah bagi melepaskan diri dari tanggungjawab.

“Saya kesal dengan kamu semua. Kamu menipu. Dalam program hukuman tetapi kamu masih berani nak cari jalan curi tulang.” Puan Hajah Zaiton meluahkan kekesalannya.

Semua lapan pelajar jadi tertunduk. Tidak ada sebarang pembelaan yang mampu menyelamatkan mereka.

Puan Hajah Zaiton melepaskan nafas, “Saya tak ada cara lain. Saya akan telefon semua ibubapa kamu dan ceritakan hal sebenar. Kamu semua akan digantung sekolah!”

Mendengar hukuman baru itu, masing-masing ternganga. Mereka tidak menyangka, serius sekali segala yang berlaku. Lalu Fasha dengan cemas mara ke hadapan.

“Puan, tolonglah. Jangan beritahu ibubapa kami. Kami janji selepas ini kami

akan cuci tandas sendiri. Kami tak tipu lagi.” Rayuan Fasha bersungguh-sungguh.

Mendengar rayuan anak Tan Sri itu, Puan Hajah Zaiton memandang lama ke arahnya. Tidak yakin dan tidak pasti janji yang dihulur itu boleh dipercayai. Pengetua itu berbolak-balik samada mahu memberi peluang kedua kepada pelajar-pelajar di hadapannya itu.



Tiga bulan kemudian.....

Tamat sudah program hukuman mencuci tandas yang dijadualkan selama tiga bulan. Walaupun program sudah tamat, semua ahli *The Wannababes* tetap bergilir-gilir menjaga tandas itu. Tandas itu sudah bertransformasi sepenuhnya dengan kesungguhan ahli *The Wannababes*. Mereka berjaya menunaikan janji yang dimeterai dengan Pengetua. Mereka membersihkan sendiri tandas itu sepanjang tiga bulan tempoh hukuman.

Malah mereka juga sudah merubah gaya dekorasi dalam tandas itu. Dindingnya dicatkan dengan warna padanan merah jambu. Lebih hebat, mereka menampal hiasan dinding berbentuk berlian bagi menyerlahkan gaya mewah. Lantai pula sudah sepenuhnya dihamparkan dengan tikar getah berlubang istimewa bagi memastikan tiada lagi masalah lantai licin dan lecak. Lampu-lampu kalimantang juga digantikan dengan lampu berukir bunga-bunga kerawang.

Selain itu, ahli *The Wannababes* juga sudah memasang radio siap dengan stereo pembesar suara di dalam tandas itu. Mereka memastikan radio itu memainkan lagu-lagu klasik yang membawa ketenangan jiwa kepada pengunjunya. Hiasan tidak dilupa. Setiap sinki dihiasi dengan bunga-bunga segar yang ditukar seminggu sekali.

Setiap hari juga mereka memastikan soket aromaterapi Ambi Pur dipasang.

Cinderella di Aidilfitri

Wangi dan harum sungguh seluruh tandas itu dibuatnya! Semenjak tandas itu bertukar rupa, ianya tidak lagi dipanggil dengan nama tandas pelajar tingkatan 5. Nama tandas itu kini '*Toilet Bling Bling*'. Tandas itu jadi popular di seluruh Sekolah Menengah Sri Bangsar kerana diiktiraf tandas paling selesa dan bergaya. Setaraf dan sesuai dengan mereka yang merubahnya iaitu ~*The Popular The Wannababes!*~

~ TAMAT ~

MAHU DAPATKAN BUKU BLINK?



**SILA WHATSAPP
NOMBOR TELEFON INI :
0193365205
(WHATSAPP SAHAJA)**